

■ VAL MEDEL

Resun sils «Piogns» digl onn 2018

Entgins patrats e resuns sils «Piogns», dall'entschatta tochen igl onn 2018. Prezias redactors Linus Beeli, Linus Flepp, sur Giusep Venzin e collaboraturas e collaborators dils «Piogns». Lavur entira han ils redactors dils «Piogns» e lur collaborators fatg. Cun grond dun ed inschign presentan els la Val Medel. Da vischinas e vischins che han in giubileum en alta vegliadetgna vegn ei fatg menziun e gratulau. Era dils trapassai vegn ei seregurdau els necrologs. Quei tratg genuin medelin tschaffa spèrt ed olma da lecturas e lecturs.

Sur Giusep, il plevon ella Val Medel, in meister dalla plema e dil plaid, ei habels da tschaffar ils carstgauns en lur far e demanar. El ei in bien plevon, in bien oratur, in scribent da vaglia, translatur competent dalla Sontga scartira, in Medelin passiuau, incarnau. Era Beeli lavura exemplaricamein e cun anim grond pils «Piogns». Collega Flepp s'engascha cun grond talent sco designader e pictur artistic pils «Piogns». El e ses conredactors mettan sin punt quels che periclitetschan il beinstar da vischinas e vischins dalla Val Medel. Gie, tgei deletg e tgei cletg che nus Medelinas e Medelins havein cun els treis, els ch'èin buns promoturs e representants da cultura en vischnaunca. Lecturas e lecturs bassegian da survegnir lur «Piogns», lur nutriment spirital aschi car.

Jeu gratuleschel als collaborators per lur gronda lavur. Pil pli ein temas comunals vegni a plaid, e quei ei capeivel: Ils «Piogns» eran ed ein patertgai sco cuntruaziun dil cudisch «Val Medel», sur l'egida da scolast secundar e menader dil post da Radio romontsch e dalla Televisiun romontscha, Clemens Pally, Cueral Curaglia, e conauturs. Engrazia ditgel als dus Linus ed a sur Giusep, stei bein e stei en pei! *Giusep Librat Bundi Pally, ffem*

La LR surpiglia il timun per la digitalisaziun

■ (cp) Cun ses «Clom per ina strategia digitala rumantscha» ha la Pro Svizra Rumantscha (PSR) lantschà en ina comunicaziun da medias dals 11 da mars 2019 ina discussiun publica davart la digitalisaziun per la Rumantschia. En questa comunicaziun ha la PSR puntuà, che la Lia Rumantscha en special saja dumandada da prender il timun per il rumantsch en connex cun la digitalisaziun per la Rumantschia. Quest giavisch han representants da differentas instituziuns ed uniuns confermà venderdi passà a caschun da la discussiun publica organisada da la PSR en il hotel Stern a Cuira. La Lia Rumantscha ha decidì oz da prender il timun en questa dumonda a partir dad immediat.

La Lia Rumantscha engrazia a la Pro Svizra Rumantscha per l'iniziativa da manar questa discussiun davart la digitalisaziun per la Rumantschia che ha chatà fitg buna accoglientscha il venderdi saira. La LR vegn a collavurar en dialog cun la PSR e cun acturs interessads a questa dumonda che vegn a fatschentar intensivamain la Rumantschia en l'avegnir. En contact cun cusseglier guvernativ Jon Domenic Parolini prepara la LR l'inoltraziun dad in concept per la digitalisaziun per la Rumantschia.

Per quest motiv è la LR londervi da discussiunar ils proxims pass ensemen cun la PSR.



La Svizra ed er l'entira UE midan la dumengia che vegn sin il temp da stad.

MAD

Parlament da l'UE vul renunziar al temp da stad

■ (rtr) La midada da temp d'enviern sin temp da stad ed enavos è dapi onns dispiatavla: En dus onns vul il parlament da

l'UE stritgar la midada tranter il temp d'enviern e quel da stad. Quai han decis ils deputads dal parlament europeic a

Strasbourg. La decisiun definitiva davart la midada da l'ura prendan però ils ministers dals singuls stadis commembers.

La Chasa editura rumantscha è fitg activa

■ (cp) La Chasa Editura Rumantscha (CER) ha tegni sia radunanza generala e preschenta ses rapport e quint annual. Era questa giada è il quint equilibrà ed ils associads da la CER èn cuntents dal prestà da l'onn passà. L'onn 2018 ha cumenzà per la CER cun in «highlight»: Per la publicaziun sablun ha l'autur Dumenic Andry retschavì il premi svizzer da litte-

ratura. Ina distincziun che remunerescha la lavur da l'autur, dentant era ina conferma per la lavur prestada da la chasa editura davostiers. Il program d'ediziun dal 2018 sa preschenta en buna cuntruaziun da las diversas retschas; cun quatter novas ediziuns belletristicas e dus cudeschs illustrads per uffants. La vendita è stada cun var 3000 products buna,

da quels en 76 (2017: 48 ex.) stads en furma digitala, vul dir e-books. Ils associads da la CER èn fitg cuntents cun la cuntinuitad e la varietad da las publicaziuns e stiman las numerusas activitads per ina buna representaziun entras la manadra da fatschenta Anita Capaul – ed els sa legiran sin las proximas preschentauns da cudeschs da la CER.

Di mundial d'autissem – discurs cun Röbi Koller

■ (cp) In'occurrenza da la «Stiftung für wahrnehmungsbehinderte Menschen in Graubünden». Mardi, ils 2 d'avrigl 2019, a las 18.00 en la Biblioteca chantunala dal Grischun a Cuira.

Noss mintgadi consista d'obligaziuns e d'acziuns che nus pratitgoin savens senza blier pensar. Nus vivain noss mintgadi

– quietamain e d'accord cun persunas, cun chaussas e cun las disas colliadas cun quai. Persunas che partan lur mintgadi cun autistas e cun autists, han sfurzadamain in'otra perspectiva sin quest mintgadi apparentamain uschè lev da dumagnar: Chaussas naturalas daventan nunchapiblas e chaussas usitadas nunusitadas.

En in discurs cun Röbi Koller rapportan proxims confamigliars d'autistas e d'autists davart lur experientschas cun dumagnar quest mintgadi uschè different. Participantas e participants: Aron Moser / Luisa Paganini / Eva Roselt / Sabina Hitz / Michela Lardi. Moderaziun: Röbi Koller.


■ SVIZRA

Dapli subvenziuns per implants solars

(rtr) La Confederaziun po subvenziunar quest onn implants solars cun 180 milliuns. Quai èn 30 milliuns dapli che spetgà. I dettia dapli daners, perquai ch'ils pretschs sin il martgà da l'electricitad sajan creschids l'onn passà. Tgi che ha pia inoltrà fin avant tschintg onns la dumonda da subvenziunar in grond implant fotovoltaic, survegn fin la fin dal 2019 ina garanzia finanziara. Grazia als daners supplementars po la glista da spetga per bunificaziuns unicas vegnir reducida. La Confederaziun sustegna quest onn en tut passa 2000 implants solars. Pajadas vegnan las subvenziuns dals consumers d'electricitad. Quels pajan dapi l'onn passà in supplement da 2,3 raps dapli per urakilowatt.

Bunas notas per emetturs da radio e televisiun

(rtr) Ils programs svizzers da radio e televisiun vegnan anc adina tadlads e guardads blier e validads bain. Quai musa l'enquista dal public che l'Uffizi federal da comunicaziun fa. In pass enavant haja fatg surtut la televisiun regiunala Las meglieras notas han survegni ils radios SRF, anc avant las televisiuns SRF.



CARICATURA L. FLEPP

Chadaina da fortuna per unfrendas da guerra

■ (cp) Gievgia, ils 28 da mars 2019, rimna la Chadaina da Fortuna ensemen cun la SRG SSR daners per las unfrendas da guerra en il Jemen. Ina da las centralas da collecta da telefon vegn endrizzada tar Radiotelevisiun Svizra Rumantscha (RTR) a Cuira. Là pon vegnir fatgas donaziuns via il numer da telefon gratuit 0800 87 07 07 a partir da las 7.00 fin las 23.00.

Durant il di nazional da solidaritad per las unfrendas da guerra en il Jemen vegnan voluntarias e voluntaris a prender encunter donaziuns en las unitads d'interpresa da la SRG SSR a Turitg, Cuira, Lugano e Geneva. Ina da las centralas da la collecta da telefon vegn endrizzada tar RTR a Cuira. Là èn voluntaris e prominenz sco p.ex. Marcus Caduff, Ladina Heimgartner, Peter Peyer, Anita Capaul, Martin Candinas, Clau Scherrer, Nevin Galmarini euv. tuttadi al telefon. Cun las donaziun sustegna la Chadaina da Fortuna sias ovras d'agid partenarias che gidan la populaziun avant lieu. Las donaziuns vegnan duvradas en emprima lingia per ils basegns urgents sco mangiativas ed il provediment medicinal.

Durant il di nazional da collecta pon vegnir annunziadas ad RTR donaziuns a partir da la damaun a las 7.00 en fin 23.00 via il numer da telefon gratuit 0800 87 07 07. Donaziuns pon ins era far online via www.glueckschette.ch da tut temp.

LA QUOTIDIANA

Editura: Samedia Press AG
 Editor: Hanspeter Lebrument
 CEO: Thomas Kundert
 Schefredactor: Martin Cabalzar

Redacziun
 Agentura da Novitads Rumantscha (ANR):
 Flurin Andry (fa), Augustin Beeli (abc),
 Andreas Cadonau (ac), Claudia Cadruvi (vi),
 Gieri Antoni Caviezel (gac), Annatina Filli (afi),
 Hans Huonder (hh), Susi Rothmund (sr),
 Gion Nutegn Stieger (gns).
 Collavurators redacziunals:
 Giusep Capaul (gc), Lucas Deplazes (ld),
 Bartholome Tschanner (bt).
 Adressas redacziunals:
 La Quotidiana, Via Sommerau 32, 7007 Cuira,
 tel. 081 255 57 10,
 mail: redacziun@laquotidiana.ch

Agentura da Novitads Rumantscha (ANR):
 Via da Masans 2, 7000 Cuira,
 tel. 081 250 48 00,
 mail: anr@spin.ch
 Surselva: tel. 081 936 47 00,
 mail: surselva@anr.ch
 Engiadina: tel. 081 864 81 12,
 mail: engiadina@anr.ch
 Surmeir: tel. 079 430 69 30,
 mail: surmeir@anr.ch
 Schons: tel. 081 637 13 45 / 079 869 03 18
 mail: tschanner.savognin@bluewin.ch

Editura Samedia,
 Via Sommerau 32, 7007 Cuira;
 tel. 081 255 50 50,
 mail: verlag@samedia.ch
 Servetsch d'abuments e da distribuziun:
 Via Sommerau 32, 7007 Cuira,
 tel. 0844 226 226,
 mail: abo@samedia.ch

Inserats:
 Samedia Promotion,
 Via S. Clau Sura 11, 7130 Glion
 tel. 081 920 07 17, fax 081 920 07 18,
 mail: ilanz.inserate@samedia.ch

La Quotidiana compra tschintg giadas ad emna
 Ediziun derasada: (Südstschweiz cumplet)
 72319 exemplars, Ediziun vendida 68613 exem-
 plars (WEMF-/SW-beglaubigt, 2018)
 Derasaziun: 163 000 lecturs (MACH-Basic 2018-2)

Pretschs d'abunaments sut:
 www.suedostschweiz.ch/aboservice

Comunicaziun da participaziun considerablas
 sin fundament da art. 322 CP:

nagin

© Samedia